

無量化佛一一化佛皆說是語

佛告阿難如是衆法名觀像法若觀像法皆自當更有無量百千諸勝境界如是觀者名為正觀若異觀者名為邪觀

十七末

觀佛三昧海經卷第九

覆九

技藝

上音伎下假也

蟠

逆也

騰

而究也

觀佛三昧海經卷第十

覆十

東晉天竺三藏法師佛陀跋陀羅譯

念七佛品第十

佛告阿難若有衆生觀像心成次當復觀過去七佛像觀七佛者當勤精進晝夜六時勤行六法端坐正受當樂少語除讀誦經廣演

一

孟

法教終不宣說無義之語常念諸佛心心相續乃至無有一念之間不見佛時心專精故不離佛日過去久遠有佛世尊名毗婆尸佛身高顯長六十由旬其佛圓光百二十由旬身紫金色八萬四千相一一相中八萬四千好一一好中無數金光一一光中有恒沙化佛一一化佛有恒沙色光一一光中無數諸天聲聞比丘菩薩大衆以為侍者人人各持一大寶華華上皆有百千億寶摩尼網豔網豔相次高百千丈以為佛光是時佛身益更明顯如百千日照紫金山光明豔起化佛無數一一化佛猶如百億日月俱出令行者見毗婆尸佛偏袒右肩出金色臂摩行者頂告言法子汝行觀佛三昧得念佛心故我來證汝汝今可觀我真色身從一一相次第觀之汝當至心立金剛誓我等先昔行佛道時與汝無異爾時毗婆尸佛慰行人已即時化作大寶蓮華如須彌山佛在華上結加趺坐為

於行者說念佛念法及說百億旋陀羅尼行者見已倍加歡喜敬禮彼佛彼佛告言若有衆生聞我名者禮拜我者除却五百億劫生死之罪汝今見我消除諸障礙得無量億旋陀羅尼於未來世當得作佛

我與六佛現其人前上坐毗婆尸爲此法子說念佛三昧尸棄世尊身長四十二由旬身紫金色圓光四十五由旬通身光明一百由旬其光網中無數化佛及諸菩薩聲聞大衆諸天眷屬以爲圍遶隨從佛後右旋宛轉是時行者見尸棄佛更復增益無量百千陀羅尼門復更增廣得見百千無數化佛於未來世過算數劫於其中間恒得值遇諸佛世尊生菩薩家說是語時復有無數百千天子聞是事已見佛色身端嚴微妙同時皆發三菩提心毗舍世尊舉身放光住行者前其佛身長三十二由旬圓光四十二由旬通身光六

覆十

二

十二由旬身紫金色光明威相如前無異見此佛已復更增進諸陀羅尼三昧門於未來世必定不疑生諸佛家拘留孫佛亦放大光明住行者前其佛身長二十五由旬圓光三十二由旬通身光五十由旬相好具足如紫金山見此佛者常生淨國不處胞胎臨命終時諸佛世尊必來迎接拘那含牟尼佛放大光明住行者前其佛身長二十由旬圓光三十由旬舉身光長四十由旬光相具足見此佛者即得百億諸三昧門無數陀羅尼若出定時常得諸佛現前三昧如此三昧證明行者所以名諸佛現前三昧者得此三昧出定入定行住坐卧恒得親見一切諸佛以妙色身現其人前迦葉世尊放大光明住其人前佛長十六丈身紫金色相好具足見此佛者得寂滅光無言相三昧於未來世恒住大空三昧海中釋迦牟尼佛身長丈六放紫金光住行者前彌勒世尊身長十六丈如是諸佛

各入普現色身三昧現其人前令其行者心得歡喜以歡喜故是諸化佛各伸右手摩行者頂見七佛已見於彌勒見彌勒已賢劫菩薩一一次第逮及樓至各放光明住行者前時千菩薩各各讚歎念佛三昧及為行者說諸菩薩性說諸菩薩解說諸菩薩慧是名因

覆十

三

觀像心得念佛三昧佛告阿難佛滅度後佛諸弟子如是觀者是名正觀若異觀者名為邪觀修此三昧者雖具煩惱不為煩惱之所使也以是念佛三昧力故十方諸佛放大光明現其人前光明無比三界特尊佛說是語已時梵天王復更勸請願佛世尊

說十方佛住行者前光明色相

觀佛三昧海經念十方佛品第十一

佛告阿難云何行者觀十方佛觀十方佛者東方為始東方有世界國名寶安隱無量億寶有億千色以用合成佛号善德亦放無數光普照百千國亦與無數億分身諸化佛住

於行者前身色如金山端嚴甚無比坐大金剛窟無數雜寶光莊嚴為堂閣一堂閣前無量微塵數百億諸寶樹一一寶樹下八萬四千師子座一一師子座有一分身佛結加趺坐三昧座於寶樹下善德佛世尊身長二百五十億那由他由旬一一身毛孔無數億微塵一切勝相好一一相好中有無數化佛一一化佛高顯巍巍如須彌山放大光明坐寶蓮華住虛空中分身諸佛各各開現微妙光明顯出無數百千化佛一一化佛坐寶蓮華一一蓮華有千幢播一一幢播演出百億微妙音聲是諸聲中教觀十方無數佛身此相現時見十方界猶如金剛百億寶色不滅不壞見此相已於諸佛前受法王子位如是境界名性地菩薩

南方拈檀德佛身相高顯其佛國土瑠璃為地恒沙寶色於佛光中亦有無數百千堂閣寶樹行列鋪師子座座上諸佛結加趺坐寶

幢幡蓋說法音聲如佛海三昧說西方無量
明佛國土清淨黃金為地五百億寶色佛身
光明重閣講堂寶樹行列寶師子座分身諸
佛結加趺坐坐寶樹下寶幢幡中亦說念佛
海北方相德佛其地頗梨色有五百億寶光
寶樹行列寶師子座重閣講堂幢幡光明與
彼無異

復十

四

東南方無憂德佛其地七寶色一一色上有
七百億雜色寶樹行列重閣光明百億萬種
一一光明說佛功德海如佛海說西南方寶
施佛其地五寶色一一寶上五百億光明一
一光明化為五百億蓮華雲一一蓮華雲上
有百億重閣一一重閣如百千萬億梵王宮
一一梵王宮中無數牀座光明蓮華所共合
成是諸座上有諸分身佛結加趺坐演說諸
佛大慈悲法光明洞然亦說佛海西北方華
德佛其佛國土瑠璃頗梨色一一色上有無
數百千光一一光化為五百億寶窟一一窟

中無數寶蓋一一蓋中百億光明一一光中
無數分身佛結加趺坐放大光明其光明中
說念佛三昧因念佛三昧中復更得見無數
諸佛東北方三乘行佛其佛國土純白銀色
百億萬光光有千色莊嚴國界極令清淨分
身化佛寶樹幢幡行列莊嚴數不可知上方

廣眾德佛其地五百億寶色一一寶色無數
光明一一光明化為無數百億化佛一一佛
光中無量寶樹行列莊嚴一一樹下百億寶
師子座諸佛在上結加趺坐無數菩薩以為
侍者一切大眾皆悉住佛光明雲中下方明
德佛其地金色金光金雲於光雲中無數金

復十

五

臺七寶樓閣百寶行樹羅列莊嚴寶幢幡蓋
數億千萬一一樹下百億寶座諸堂樓閣無
數坐具狀如寶華無數分身一切諸佛坐寶
樹下瑠璃座上眾華色間無數佛會是諸世
尊皆悉講說菩薩行法如是十方無數化佛
一一化佛顯現光明時十方佛各各悉坐金

剛窟中身量光明如善德佛及諸化佛威神
 國土令行者見如於明鏡自見面像了了分
 明見十方佛心歡喜故不染諸法住於初心
 時十方佛廣為行者各說相似六波羅蜜聞
 是法已於初地下十心境界無有疑慮見此
 事者必聞諸佛說般若波羅蜜聞第一義空
 心不驚疑於諸法中得入空三昧是名相似
 空相三昧

佛告阿難佛滅度後我諸弟子欲觀十方佛
 者於念佛三昧中但知麤相當自然知無量
 妙相如是觀者是名正觀若異觀者名為邪
 觀得此觀者見佛無數不可限量入此定者
 名見一切諸佛色身亦得漸漸入三空門遊
 此空者諸佛力故心不著空於未來世當成
 阿耨多羅三藐三菩提得不退轉是名不忘
 菩提之心正順佛道說觀十方佛時十方佛
 坐金剛山百寶窟中各伸右手摩阿難頂告
 言法子汝持佛語為未來世諸衆生等當廣

宣說慎勿妄傳當為堅發三菩提心行念佛
 定正受者說

佛告阿難此念佛三昧若成就者有五因緣
 何等為五一者持戒不犯二者不起邪見三
 者不生憍慢四者不恚不嫉五者勇猛精進
 如救頭然行此五事正念諸佛微妙色身令
 心不退亦當讀誦大乘經典以此功德念佛
 力故疾疾得見無量諸佛見諸佛者獨一心
 淨不與他共應當供養十方諸佛云何供養
 是人出定入塔見像誦持經時若禮一佛當
 作是念正遍知諸佛心智無有限礙我今禮
 一佛即禮一切佛若思惟一佛即見一切佛

覆十

六

見一一佛前有一行者接足為禮皆是已身
 若以一華供養佛時當作是念諸佛法身功
 德無量不住不壞湛然常安我今以華奉獻
 諸佛願佛受之作是念已復當起想我所就
 華從草木生持此供養可用擬想即當作想
 身諸毛孔令一毛孔出無數華雲以此華雲

運想擬意供一切佛一一佛上化成華臺諸佛受之於十方界施作佛事供養香時亦復如是香烟香雲於十方界施作佛事作佛事已還成金臺住行者前若凡夫人欲供養者手擎香爐執華供養亦當起意作華香想當發是願願此華香滿十方界供養一切佛化佛并菩薩無數聲聞眾受此香華雲以為光明臺廣於無邊界無量作佛事禮佛若坐禪起是供養心常當發是願願繒蓋幢幡音樂偈頌當作是願我今設此少分供具願此供具遍供十方一切諸佛諸佛受已於幢幡中化光明雲於妓樂中偈頌之中演妙法音作是願已坐時應想令身毛孔一一孔中作無量幢幡想一一幢幡中作無量偈頌雲想作是想時心如香爐流出金色香烟香雲身毛孔中如好華樹涌出阿僧祇無量雜華雲是諸華雲於十方界諸佛之上化為一切諸供養具爾時當於身心分中起一切供養具想

十

七

若得食飲若施人一錢當起空無我想檀波羅蜜如是等無量供養皆當起心從心想出供養十方一切諸佛是名坐時無量功德從心想海生如是坐時入深禪定無量境界諸三昧海但於心中出息入息念念想想相續不絕於一心中運其心意作無數供具雲上供諸佛下施一切作是念者名學普施此想成時漸漸減少諸煩惱結觀法無二相無相力故當得甚深六波羅蜜

觀佛三昧海經密行品第十二

佛告阿難未來眾生其有得是念佛三昧者觀佛諸相好者得諸佛現前三昧者當教是人密身口意莫起邪命莫生貢高若起邪命及貢高法當知此人是增上慢破滅佛法多使眾生起不善心亂和合僧顯異惑眾是惡魔伴如是惡人雖復念佛失甘露味此人生處以貢高故身恒卑小生下賤家貧窮諸衰無量惡業以為嚴飾如此種種眾多惡事常

自防護令永不生若起如是邪命業者此邪命業猶如狂象壞蓮華池此邪命業亦復如是壞敗善根

佛告阿難有念佛者當自防護勿令放逸念佛三昧人若不防護生貢高者邪命惡風吹憍慢火燒滅善法善法者所謂一切無量禪

定諸念佛法從諸心想生是名功德藏

佛告阿難譬如長者多饒財寶唯有一子長者自知將死不久以諸庫藏委付其子其子得已隨意遊戲忽於一時值有王難無量眾賊從四面來競取藏物不能遮護唯有一金乃足間浮檀那紫金重十六兩金銀長短亦十六寸此金一兩價直餘寶百千萬兩為賊所逼無奈金何即以穢物纏裹真金置泥團中眾賊見已不識是金脚踐而去賊去之後財主得金心大歡喜念佛三昧亦復如是當密藏之

復次阿難譬如有人貧窮薄福依諸豪貴以

卷十

八

存性命時有王子遇行出遊執大寶瓶於寶瓶內藏王印綬是時貧者詐來親附得王寶瓶擎持逃走王子覺已遣六大兵乘六黑象手執利劍疾走追之時持瓶人走入深草空野澤中見曠野澤滿中毒蛇四面吐毒吸持瓶者時貧窮人惶惶驚怖馳走東西蛇亦隨之無藏避處於空澤中見一大樹蒼鬱扶踈甚適其意頭戴寶瓶攀樹而上既上樹已六兵乘象馳疾如風尋復來至貧人見已吞王寶印持瓶冠頭以手覆面坐貪惜故不忍見之時六黑象以鼻絞樹令樹躡倒貧人落地身體散壞唯金印在寶瓶現光諸蛇見光四散馳走佛告阿難住念佛者心印不壞亦復如是

復次阿難譬如長者多饒財寶無諸子息唯有一女是時長者年過百歲自知朽邁將死不以其財寶無男兒故財應屬王作是思惟喚其女子密告之言我今有寶寶中上者

當以遺汝汝得此寶密藏令堅莫令王知女
受父勅持摩尼珠及諸珍寶藏之糞穢室家
大小皆亦不知值世饑饉女夫告妻我家貧
窮困於衣食汝可他行求自活處妻白夫言
我父長者臨命終時以寶賜我今在某處君
可取之時夫掘取大獲珍寶并如意珠持如

復十

九

意珠燒香禮拜先發願言為我兩食隨語即
兩百味飲食如是種種隨意得寶時夫得已
告其妻言卿如天女能賜我寶汝藏此寶我
尚不知況復他人佛告阿難念佛三昧堅心
不動亦復如是

復次阿難譬如有王暴虐違道民羅其毒人
怨神怒國大亢旱求請神祇不能得雨有目
白言大王當知今此境內林藪之中有一仙
士五通無礙王可祈請令其呪龍大王聞已
欣踊無量遣人詣林請仙人出仙神飛往大
王殿前高聲唱言大王無道諸天龍神皆悉
散去不護王國云何使我令請雨也王聞此

語極懷慚愧改悔先行所作惡事仙人知王
心已轉善應念誦呪神通力故天降甘雨地
出涌泉潤澤一切佛告阿難欲念佛者如王
棄惡得念佛者如善呪人

復次阿難譬如力士自恃大力數犯王法王
遣五人收捕力士幽閉囚園五處枷鎖極令
牢固奮力大怒舉體血現枷鎖摧折踰牆逃
逝到海岸邊解髻明珠持雇船師船師語言
如此白石海中無數我用是為力士長跪白
船師言我此明珠有六種色即以黃繒裹珠
置之水中水即金色復還收珠以白繒裹置
之水中水即變白收取復以綠繒裹置之水
中水色變作綠琉璃色收取以碧繒裹置之
水中水即變作真金精色收取復以絳繒裹
置之水中水即變作碑磔色收取復以紫繒
裹置之水中水即變成赤金剛色水上復有
紫摩尼光船師見已即留寶珠以大寶轡牽
勇猛士置大船上望風舉帆疾如射箭到於

彼岸到彼岸已心意泰然安隱無懼大取珍寶報船師恩佛告阿難若念佛者如大力士挽心王鎖斷到慧彼岸

復次阿難譬如劫欲盡時二日並出山林樹木河池枯竭三日出時衆色火起四日出時大海消滅三分留一五日出時大海竭盡六

覆十

十

日出時須彌崩倒七日出時大地洞然乃至色界唯金剛山不可摧破還任本際念佛三昧亦復如是行是定者在過去佛實際海中佛告阿難吾今欲與十方諸佛報念佛三昧恩爾時世尊說是語已及十方諸佛賢劫菩薩入一切色身光明三昧時諸佛身一一毛孔

孔涌出衆多不可稱數微妙化佛雲是諸化佛結加趺坐住立空中如是無數一切化佛各伸右手摩阿難頂及勅釋提桓因汝等二人持是妙法慎勿忘失為未來世濁惡衆生滅衆罪障故如來正遍知今於大衆中說一切佛身相

爾時尊者阿難即從坐起頂禮佛足白佛言世尊當何名此經此法之要當云何持佛告阿難此經名繫想不動如是受持亦名觀佛白毫相如是受持亦名逆順觀如來身分亦名一一毛孔分別如來身分亦名觀三十二相八十隨形好諸智慧慧光明亦名觀佛三昧

海亦名念佛三昧門亦名諸佛妙華莊嚴色身亦名說戒定慧解脫解脫知見十力四無所畏十八不共法果報所得微妙色身經汝好受持慎勿忘失

佛說是語時比丘比丘尼優婆塞優婆夷及諸菩薩大衆天龍八部一切鬼神聞佛說是

覆十

十

微妙身相有得須陀洹斯陀含阿那含有得阿羅漢者有種辟支佛道因緣者有發阿耨多羅三藐三菩提心者有得無生法忍者數甚衆多不可稱說時諸大衆聞佛說法恭敬頂禮奉行佛語作禮求退是時阿難即從座起合掌長跪白佛言世尊

如來今者一切身相皆已說竟唯不顯說無見頂相惟願天尊少說頂相光明瑞應令未來世凡愚衆生知佛勝相

爾時世尊即入頂三昧海令佛頂上肉髻之中一一毛孔涌出瑠璃光其光如水螺文右旋遍滿十方無數世界如百億世界微塵數海如是八萬四千諸毛孔中皆出是水相一一水相復過是百千萬倍數不可知是諸瑠璃水上生衆多大寶蓮華華有無數百千億葉葉作無數百千億寶色葉極小者遍覆三千大千世界如是華上一一鬚間有無量阿僧祇百千萬億恒河沙化佛一一化佛頂肉

髻相流出衆光亦復如是時諸佛身量同虛空不可得知如是諸佛佛佛相次盡世界海際此相現時於十方面各有百億微塵數菩薩身昇虛空現大神變至釋迦牟尼佛所時諸菩薩以佛神力故暫見一毛孔中少分瑞相應時即得無量百千金剛相陀羅尼佛現

是相時賢劫千菩薩及十方諸佛皆現此相時會大衆見此少分相者須陀洹人如剎那頃成阿羅漢觀因緣者不緣諸緣成阿羅漢發心菩薩超越境界增進甚深三昧海門任於性地無生菩薩倍加增進無量勝法任首楞嚴三昧佛告阿難佛滅度後濁惡世中若有衆生聞佛勝相心不驚疑不生怖畏當知是人能滅一切煩惱業障聞佛勝相生隨喜者除却千億劫極重惡業後世生處不落三塗不生八難處佛說是語時長老憍陳如等諸大比丘彌勒等諸大菩薩無量大衆聞佛所說皆大歡喜頂戴奉行

觀佛三昧海經卷第十

覆十

鈐 音 鈐 金 耳 頂 反 也 朽 反 虛 久 邁 莫 敗 反 往 掘 其 勿 二 數 音 捕 音 步 因 音 周 時 微 名 音 窟 音 故 攬 音 晚 涸 音 竭 音 鶴 音 水

十二末